

आकाशवाणी

खबरां तरसेम कुमार कोला

1. सरकार नै आँदी जनगणना च जाति दी गिनतरी दा फैसला कीता ऐ।
2. भारत मुम्बई च पैहली बारी वेक्स-2025 सम्मेलन दी मेजबानी करोग। प्रधानमंत्री नरेंद्र मोदी होर वैश्विक मीडिया ते मनोरंजन कार्यक्रम दा उद्घाटन करडन।
3. भारतीय डी.जी.एम.ओ नै कब्जा लाइन पर पाकिस्तान आसेआ बिला वजह उल्लंघन खलाफ चेतावनी दिती ऐ।
4. लेफ्टिनेंट जनरल प्रतक शर्मा उत्तरी कमान दे नमें कमांडर इन चीफ होडन।
5. रक्षा मंत्री राजनाथ सिंह होर 9 मई गी मास्को च विजय दिवस परेड च शामिल होने आस्तै रूस दा दौरा करडन।
6. गंगोत्री ते यमुनोत्री दे कपाट खुल्लने कन्नै अज्जा थमां चार धाम जातरा शुरू होई गेई ऐ।

<><><><><><>

Cabinet-Briefing

सरकार नै अगली जनगणना च जाति जनगणना गी बी शामिल करने दा फैसला कीता ऐ। प्रधानमंत्री नरेंद्र मोदी हुंदी अध्यक्षता आहली राजनीतिक मामलें दी मंत्रीमंडल समिति नै इस सरबंथे च फैसला कीता। नमीं दिल्ली च मीडिया कन्नै गल्लबात करदे होई सूचना ते प्रसारण मंत्री अश्विनी वैष्णव होरें आखेआ जे आँदी जनगणना च जाति

जनगणना गी बी शामिल कीता गेआ ऐ। सरकार नै शिलांग थमां सिलचर तगर 22 जहार 864 करोड़ रपे दे नमें राजमार्ग गी बी मंजूरी दिती। श्री वैष्णव होरें दस्सेआ जे एह परियोजनां उत्तर पूर्व क्षेत्र दे विकास आस्तै इक जरिया बनोग। उनें आखेआ जे इस शिड़का दी लम्बाई 166 किलोमीटर होग ते एह त्रिपुरा, मिजोरम, मणिपुर ते असम दी बराक घाटी गी आपूं चें जोड़ग। मंत्रीमंडल नै 2025-26 बरे आस्तै 355 रपे फी क्वांटल गन्ने दे उचित ते लाह भरोचे भास गी बी मंजूरी दिती। श्री वैष्णव होरें आखेआ जे इस फैसले कन्नै 5 करोड़ गन्ने दे करसानें ते खंड दे मिल्लें च कम्म करने आहले 5 लख कर्मचारियें गी फायदा मिलोग।

<><><><><><>

Waves-Summit

भारत कल पैहले विश्व ऑडियो विजुअल ते एंटरटेनमेंट सम्मेलन वेक्स 2025 दा जियो वर्ल्ड कन्वेंशन सेंटर मुम्बई च आयोजन करोग। प्रधानमंत्री होर एहदा उद्घाटन करडन। एहदा विशे ऐ रचनाकारें गी ते मुल्खें गी किट्ठे जोड़ना। एहदे च दुनिया भरें दे रचनाकार, स्टार्टअप, उद्योग प्रमुख ते नीति निर्माता शामिल होडन। 2029 तगर वेक्स दा लक्ष्य 50 बिलियन डॉलर दा बजार ऐ। एह प्रधानमंत्री हुंदे नजरिए गी प्रदर्शित करदी ऐ। एहदा मकसद रचनात्मकता टेकनालजी ते हुनर गी किट्ठे जोड़ना ऐ।

<><><><><><>

PM-Visit

प्रधानमंत्री नरेंद्र मोदी होर कल्लै थमां दऊं दिनें दी जातरा पर महाराष्ट्र, केरल ते आंध्र प्रदेश जा करदे न। अपनी जातरा दे पैहले दिन प्रधानमंत्री होर विश्व श्रव्य दृश्य ते

मनोरंजन सम्मेलन दा मुम्बई च उद्घाटन करंगन। अगले दिन ओह केरल जांगन ते विंझिजम अंतरराष्ट्रीय इंहगे पानी च बने दे मते उद्देश्ये आहले बंदरगाह गी राश्ट्र दे नमित्त लांगन। एह देश दा पैहला कंटेनर ट्रांस शिपमेंट बंदरगाह ऐ जेड़ा विकसित भारत दे एकीकृत दृष्टिकोण दे हिस्से दे तौरा पर भारत दे समुंद्री क्षेत्र च कीती जा करदी तरक्की दी नुमायंदगी करदा ऐ। इस मौके पर श्री मोदी होर लोकें दी किट्ठ गी बी संबोधित करंगन। मगरा श्री मोदी होर अमरावती च 58 जहार करोड़ रपे दे बक्ख-बक्ख विकास परियोजनाएं दा नीह पत्थर बी रक्खंगन। विश्व स्तरीय बुनियादी ढांचे ते शिड़क संपर्क परियोजनां मुहैया करवाने दी अपनी बचनबद्धता तैहत श्री मोदी होर आंध्र प्रदेश च 7एं जरनैली शिड़कें दा उद्घाटन करंगन। इनें परियोजनाएं कन्नै शिड़क सुरक्षा च इजाफा होग। रोजगार दे मौके मिलंगन ते त्रिपति, श्री काल हस्ती, मालाकोंडा ते उदयगिरी किले जनेह धार्मिक ते सैलसफा थाहरें पर बिना रोक रुकावट आहला शिड़क संपर्क मिलोग।

<><><><><><>

India-Pak DGMO

भारतीय सेना दे सैन्य संचालन महानिदेशक-डी.जी.एम.ओ होरें पाकिस्तानी डी.जी.एम.ओ कन्नै गल्लबात कीती ऐ। उनें नियंत्रण रेखा कश पाकिस्तानी सेना दे कुसै बी अकारण उल्लंघन दे विरुद्ध चेतावनी दिती ऐ। रक्षा सूत्रें मूजब दौनें डी.जी.एम.ओ-एं कल सैन्य हॉटलाइन दे राएं गल्लबात कीती। भारतीय अधिकारी नै पाकिस्तान दे बिला वजह संघर्ष विराम उल्लंघन दा मामला पुट्टेआ।

<><><><><><>

GoC New Command

लेफ्टिनेंट जनरल प्रतीक शर्मा उत्तरी कमान दे नमें जनरल अफसर कमांडिंग (जी.ओ.सी) दे तौर पर औहदा साम्भडन। ओह इस औहदे पर 15म्हीने दा कार्यकाल पूरा करने आहले लेफ्टिनेंट जनरल एम.वी सुचंद्र कुमार हुंदा थाहर लै करदे न। एहदे थमां पैहले अज्ज सुचंद्र कुमार होरें उधमपुर दे धव युद्ध स्मारक पर बहादुर दिलें गी नमन करने आस्तै पुष्पांजलि भेंट कीती जेड़ी उंदी सेवा पूरी करने ते उत्तरी कमान दी कमान छोड़ने दी प्रतीक ऐ।

<><><><><><>

Rajnath-Moscow

रक्षामंत्री राजनाथ सिंह 9 मई गी मास्को च आयोजित विजय दिवस समारोह च हिस्सा लैने आस्तै मास्को जा करदे न। विदेश मंत्रालय दे सूत्रें दस्सेआ जे रूस नै प्रधानमंत्री नरेंद्र मोदी होरें गी समारोह च शामिल होने दा साद्दा दिता हा। उनें दस्सेआ जे रूस गी पैहलें गै दस्सी दिता गेआ हा जे रक्षा मंत्री राजनाथ सिंह होर परेड च भारत दी नुमाइंदगी करडन।

<><><><><><>

CM-Highways Meet

मुख्यमंत्री उमर अब्दुल्ला होरें अज्ज जम्मू-कश्मीर च राष्ट्रीय जरनैली शिड़क ते एक्सप्रेस-वे दी बड्डी परियोजनाएं दी प्रगति दी समीक्षा कीती। इस समीक्षा च दिल्ली-

अमृतसर-कटड़ा एक्सप्रेस-वे, जम्मू ते श्रीनगर रिंग रोड, एन.एच-44 ते एन.एच-144ए सनें मुख बुनियादी ढांचे सरबन्धी पहलकदमियें गी शामिल कीता गेआ ऐ। एह महत्वपूर्ण परियोजना केंद्र शासित प्रदेश च आर्थिक विकास गी बढ़ावा देने ते खिते च राबता बहाल करने ते ओहदे च बाददा देने दी महत्वपूर्ण भूमिका निभाग। मुखमंत्री होरें इनें परियोजनाएं दे कम्में गी समेंसिर मुकम्मल करने ते सब्भनें सरबन्धत एजेंसिएं गी तालमेल बनाइयै कम्म करने दे महत्व पर जोर भरेआ।

<><><><><><>

CBI-Cyber Crime

केंद्री जांच ब्यूरो नै साइबर अपराध नेटवर्क गी तबाह कीता ऐ जेड़ा आनलाइन बाल यौन शोषण कन्ने शामिल हा ते जेदे अंतरराष्ट्री लिंक हे। सीबीआई नै आपरेशन हॉक दे तैहत कार्रवाई कीती ऐ जेड़ा अमरीका दा हासल इनपुट दे आधार पर शुरू कीता गेआ हा। सीबीआई नै अपने बयान च दस्सेआ ऐ जे सीबीआई अंतरराष्ट्रीय संचालन प्रभाग नै भारतीय कन्ने दे तैहत दिल्ली ते मंगलोर थमां 2 आरोपियें दे खलाफ मामला दर्ज कीता ऐ। सीबीआई नै आखेआ जे जांच दौरान पाया गेआ ऐ जे आरोपी सोशल मीडिया प्लेटफार्म डिस्कार्ड दे जरियै अमरीका दियें नाबालिग कुड़ियें कन्ने यौन चैट च लग्गे दे हे। एजेंसी नै आखेआ जे आरोपियें नाबालिग पीड़ितें गी अपनियां अश्लील तस्वीरां ते वीडियो सांझियां करदे रौहने दी धमकी दिती ते आखेआ जे जेकर ओह इयां नेई करदियां तां उंदियें वीडियो इंटरनेट पर वायरल करी दिता जाग। इस मामले च सीबीआई दी टीम नै आरोपियें कन्ने जुड़े दे बकख-बकख थाहरें पर व्यापक तपाशी कीती ते इलेक्ट्रानिक उपकरण बरामद कीते। सीबीआई नै आखेआ जे उंदी टीम ऑनलाइन बाल यौन शोषण दे

खतरे कन्नै निब्बड़ने आस्तै ते वैश्विक स्तर पर बच्चें दी सुरक्षा करने आस्तै बचनबद्ध
ऐ।

<><><><><><>

Gyanpath-Design

स्वतंत्रता दिवस समारोह 2025 दे हिस्से दे तौरा पर रक्षा मंत्रालय आसेआ MyGov दे
सहयोग कन्नै पैहली थमां 15 मई तगर ज्ञानपथ दे डिजाइन लेई प्रतियोगिता दा
आयोजन कीता जा'रदा ऐ। एहदा मकसद युवाएं ते जनता च देशभक्ति दी भावना गी
बल देना ऐ। प्रतिभागियें गी लाल किले च एनसीसी कैडटें, NSS दे स्वयंसेवकें ते स्कूलें
दे बच्चें आसेआ बनाए जाने आहले फार्मेशनें गी डिजाइन करना होग। पैहले त्रौनें जेतुएं
गी 10 जहार रपे जिसले के पहले 250 प्रतिभागियें गी ई निमंत्रण पत्र थहोग जे ओह
अपने इक साथी कन्नै इस समारोह दे साक्षी बनी सकन। डिजाइनें गी MyGov दे दिशा-
निर्देशों दी पालमा करनी होग।

<><><><><><>

Ramanujan-Book

भारत दे राष्ट्रीय अभिलेखागार नै अज्ज नमीं दिल्ली च रामानुजन इक महान
गणितज्ञ दी जातरा नां दी कताब दा विमोचन कीता। एह कताब इक ऐतिहासिक
विवरण ऐ जेड़ा भारत दे गणितज्ञ श्रीनिवास रामानुजन हुंदे जीवन पर लो पांदी ऐ। इस
कताब च तमिलनाडू दे इरोड़ थमां उंदे जीवन दी शुरूआत ते उंदे आसेआ दित्ते गेदे

संख्या सिद्धांत अनंत श्रृंखला ते निरंतर अंश जनेह खास कर्मों दा दस्तावेजीकरण
कीता गेदा ऐ।

<><><><><><>

Char Dhaam Yatra

अक्षय तृतीया दे मौके उत्तर अज्ज उत्तराखंड च चार धाम जातरा दी शुरुआत होई गई
ऐ। इस मौके उत्तर उत्तराखंड जिले च गंगोत्री ते जमुनोत्री मंदरों दे कपाट खोले गे न।
मुकबा ग्रांs च 6एं महीने दे शीतकालीन प्रवास दे पर्यन्त कल मां गंगा हुंदी पालकी गी
गंगोत्री धाम लेई रवाना कीता गेआ ह। पालकी जं'दी रातीं भैरवघाटी स्थित भैरव मंदरों
च विश्राम लेई रुकी जित्थुआं मां गंगा दी उत्सव डोली अज्ज बड्डलै भैरव घाटी दे भैरव
मंदिरों थमां गंगोत्री लेई रवाना होई। गंगोत्री ते जमुनोत्री धामों दे कपाट परंपरागत प्रार्थना
ते वैदिक मंत्रोच्चार दे कर्नै अज्ज खोले गे न। हून केदारनाथ धाम दे कपाट शुक्रवारों ते
फही बद्रीनाथ धाम दे कपाट औंदे ऐतवारों खोली दिते जाडन।

<><><><><><>

Akshay-Tritiya Greetings

प्रधानमंत्री नरेंद्र मोदी हों अज्ज अक्षय तृतीया दे पवित्र मौके उत्तर सभनें गी
शुभकामनां दित्तिआं न। इक्क सोशल मीडिया पोस्ट च उ'नें आखेआ ऐ जे मनुक्खता गी
समर्पित एह त्योहार सभनें लेई कामयाबी, समृद्धि ते खुशी लेइयै औग। उ'नें इब्बी
आखेआ ऐ जे एह मौका विकसित भारत दे निर्माण दी सांझी वचनबद्धता च परतियै
नमीं शक्ति ते उर्जा प्रदान करोग। तेआई लेफ्टिनेंट गवर्नर मनोज सिन्हा हों बी जम्मू-

कश्मीर दे लोकें गी अक्षय तृतीया दे पावन मौके उत्पर शुभकामनां दित्तिआं न। एलजी होरें सब्भनं लेई खुशहाली ते सुख-समृद्धि दी कामना कीती ऐ।

<><><><><><>

Result

काउंसिल फॉर दे इंडियन स्कूल सर्टिफिकेट नै क्लास 10मीं दे आई.सी.सी.ई ते क्लास 12मीं दे आई.एस.सी म्तेहानें दी घोषणा करी दित्ती ऐ। दो लख 50 जहार थमां मते विद्यार्थियें 10मीं ते 99 जहार 551 विद्यार्थियें 12मीं दा म्तेहान दित्ते दा हा। आई.सी.एस.ई परिणाम च कुड़ियें चंगा प्रदर्शन कीता ऐ। तोआई, आईएससी म्तेहानें च बी 98.64 प्रतिशत कन्ने कुड़ियां जागतें थमां अगगे रेइयां।

<><><><><><>

12th Results

जम्मू-कश्मीर बोर्ड ऑफ स्कूल एजुकेशन नै अज्ज 12मीं जमात दी सालाना परीक्षा दे नतीजें दी घोषणा कीती ऐ जिंदे च विद्यार्थियें दी पास होने दी दर 75 प्रतिशत ऐ। इक बारी परतियै कुड़ियां-मुड़ें थमां अगगे रेहियां न। एह उपलब्धि इस खेतर च महिला विद्यार्थियें दी लगातार सफलता गी दस्सदी ऐ।

<><><><><><>

Handicrafts-Awards

कपड़ा मंत्रालय दे दस्तकारिएं सरबंधी विभाग दे विकास कमिशनर हुंदे दफ्तरै बड़ी मती प्रतिष्ठा आहले राश्ट्री दस्तकारी अवार्ड 2024 लेई आवेदन मंगगे न। 30एं बरें तगर दी

उम्मी दे कारीगर ते घट्टोघट्ट 10ए बरें दे तजुर्बे आहले एहदे शा मती उम्मी दे कारीगर बी इस राश्ट्री अवार्ड लेई आवेदन करी सकदे न। इससै चालली 20ए बरें तगर दे तजुर्बे आहले ओकड़े कारीगर जिंदी उम्र 50ए बरें शा मती ऐ, ओह शिल्प गुरु अवार्ड लेई आवेदन करी सकडन। मंत्रालय आसेआ कुल 25 पुरस्कार भेंट कीते जाडन जिंदे चा 6 शिल्प गुरु अवार्ड ते 19 राश्ट्री अवार्ड होडन। आवेदन जमा करोआने दी खीरी तरीक 12 मई ऐ। इच्छुक कारीगर, एहदे लेई अखनूर रोड जम्मू च स्थित हैंडीक्राफ्ट सर्विस सेंटर कन्नै राबता करी सकदे न जां फही वैबसाईट www.handicrafts.gov.in पर जाइयै मती जानकारी लेई सकदे न। योग्यता मानदंड, दिशा निर्देश ते होर दुए ब्यौरे इस वैबसाईट उप्पर उपलब्ध न।

<><><><><><>

Weather

मौसम विभाग नै पैहली मई तोहड़ी बक्ख-बक्ख थाहरें उप्पर गर्मी दी लैहरें दे कन्नै-कन्नै मौसम मता खुशक रौहने दी पेशगोई कीती ऐ। पैहली मई थमां 6 मई तोहड़ी गर्ज-चमक कन्नै बक्ख-बक्ख थाहरें पर हल्के दरजे दी बरखा पौने दी मेद ऐ। मैहकमे नै लोकें गी ठीक चाल्ली नै पानी पीने ते जरूरी सावधानी बरतने दी सलाह दिती ऐ, खासतौरा पर उंनं इलाकें च जित्थें मता तापमान ते खुशक मौसम रौहने दी मेद ऐ। मौसम विभाग नै लोकें गी इब्बी सलाह दिती ऐ जे 12 बजे थमां 3 बजे दे बश्कार बाहर कम्म करने थमां परहेज करन।

<><><><><><>

Delhi-IIT Agreement

भारतीय प्रौद्योगिकी संस्थान नर्मो दिल्ली ते जल शक्ति मंत्रालय बश्कार केंद्री जल
आयोग नै डेटा साइंस, आर्टिफिशल इंटेलीजेंस ते मशीन लर्निंग समेत कई आधुनिक
तकनीकें गी लेइयें अज्ज इक्क समझौता जापन पर हस्ताक्षर कीते न। इस समझौते दा
मकसद अत्याधुनिक तकनीकें राएं जल संसाधन दा प्रबंधन करना ऐ। इस समझौता
जापन तैहत सीडब्ल्यूसी ते आईआईटी आसेआ कई खेत्तरें च इक्क-दूसरे गी सहयोग
करने पर सहमति बनी ऐ। इनें खेत्तरें च जल संसाधन प्रबंधन आस्तै हाइड्रो सूचना
विज्ञान उपकरणें ते प्रौद्योगिकियें दा अनुप्रयोग, नवीनतम प्रौद्योगिकी दा उपयोग करियें
बाढ़ प्रबंधन, पर्यावरणीय प्रवाह बवस्था दा आंकलन, जल गुणवत्ता विश्लेषण ते सिंचाई
प्रबंधन शामिल ऐ।

<><><><><><>